

questo sa per uno Andrea Garbuio, veniam, fo comito del bassà, fuzito, e vene in la nostra armada, et per dubito fu posto in ferri. *Item*, de li vene el Manenti, passò con una galia sibinzana a Castel Tornese, fato le sue pratiche, vene 100 cavali, el castelan, el prothoiero. E uno Zuan Canavi, canzelier di la Morea, fo a parlamento; feli bona compagnia, andò a Patras a trovar el bassà, per esser a parlamento. Segundo vederà, se transferirà fino in Andernopoli, a trovar el bilarbei se atrova col signor. Et el ditto fo acompagnà con cavali 80, do vayvoda, e fato gram careze; e turchi desidera molto la paxe. *Item*, el zeneral è amalado; si O intravegnisse, saria fato missier Domenego Malipiero, per esser savio e suficiente; e si l'avesse manchà di l'armada fina hora, tristi l'horo! Dice non pol scriver el suo governo è tanto ben vojudo da pizoli e grandi; e, finita questa impresa, vegnirà a Venexia *etc.*, e non sa chome farà l'armada di governo. Missier Tomà Zen, è a l'impresa capetanio, tuto el zorno zuoga li pugni con li soi governadori. El diavolo non puol far simel homo. Se fosse stà missier Domenego Malipiero a quella impresa, seria spazà fina hora, per haver governo, et esser ben visto da' galioti.

- 47\* *Copia di una letera scritta per Zuan di Tabia, consolo nostro a Syo, a sier Piero Dolfim, fo di sier Zorzi, copiosa di nove, di 15 octubrio fin 5 decembrio 1499.*

Habiamo hauto per letere de Galipoli, de do de l'istante, como lo signor turcho, zoè la soa persona, ritornava alozar in le circumstantie de Salonichi, per andar a invernar in Andernopoli. Per un altro citadim de questa terra, molto pratico in Turchia, avanti eri qui zonto, partì da Tracomonti ancoi quarto di, loco presso Magnisia una zornada e mancho, ho hauto lui haver inteso da turchi proprij suo' cognoscenti, esser zonto uno olacho al zalabi de Magnisia, per darge la nova de la presa de Nepanto; el qual conferma el ritornar del signor a la volta de Andernopoli, come è di sopra. Ancora havemo inteso, ditto signor haver comandato a far galie 100 nove; *tamen* questo de certo non se sa. *Prætereà* dice, como quelli de Nepanto, se sono resi a pati, hanno fato lamenti al capetanio dil campo, digando a l'horo esser stà fato grande oltrazo a venirge adosso con tanto exercito, hessendo l'horo carazari del signor. El qual capetanio ge disse: Non hè el vero, che voi seti carazari del signor. E l'horo dicono esser za molti anni, che l'horo hanno pagato lo carazo a

Chmar bei. Inteso questo, lo signor turco mandò per Amar bei; el qual, non possendo negar questo, ha dito haver hauto ditto carazo da quelli di Nepanto, con intelligentia de l'braim bassà. Se dice, per tal causa el signor ha levato lo timarati a ditto Amar bei e fatolo manzil; e l'braim bassà, per esser stà discoperto, s'è atosegato lui medemo, et è morto. Dice ancora, haver inteso esser stà morto Calil agà, el flambulari de la Morea, in una zuffa fata in armada. Ancora dice, lo signor turcho ha licentiatu tutti li axapi terestri et spachi, zoè timarati, li quali ritornano ogni di a l'horo caxe. Tute le sopra ditte cosse me le ha rasonate ditto citadim, haverle haute da turchi proprij, in ditto loco de Tracamonti et a Vorla, dove ha passato. Nel qual loco de Vorla sono multiplicate le fuste, e adesso se atrovano de li fuste 12; lo cavo de le qual hè Caradormis, fradelo de Caracassam; el qual Caracassam è stà morto da una bombardà. El Camalli et Erihi sono vivi, in l'horo malora. Altro non si ha fin sto di. A di ditto, poi scruta: per letere aute dal passazo di mio fradelo, de questo presente zorno, hauta per lui diligente informazion, me conferma l'andar del signor in Andernopoli; l'armada dovea invernar nel colfo di Nepanto; *etiam* conferma la infermità dil signor turcho, et la causa de Amar bei; e dice più avanti, como ditto Amar bei era in destreto, e conferma la morte de l'braim bassà con veneno, perchè questi do manzavano certi presenti haveano ogni anno da quelli di Nepanto. El timari del qual Amar bei, hè stà dato ad Ali bassà, el monucho, el qual iera al presente in Andernopoli, et è partito per andar a ditto timari. Ancora, per letere di Pera, di 5 di l'istante, vien confirmado la partita dil signor di Nepanto, e dovea andar a Constantinopoli.

*A di 30 ditto.* Le fuste, come ho dito di sopra, sono multiplicate grandemente; atrovandose Caradormis in Soneaxari con le soe 5 fuste. Sorazon-seno a di 15 di l'istante fuste 12. Se dice sono del zalabi de Domosli, sta per mezzo Rodi, tra le qual sono do grande, l'una di banchi 22, l'altra di 18, e le altre cosse picolle. Le qual fuste 12 hano brusato de le ditte fuste 5 de Caradormis, et è scampato esso a la montagna con soi compagni. E questo è certo, perchè uno citadino di questo loco se à trovato quel zorno in Soveazari, et hale viste brusar. Et questo se dice per esser stà fato, perchè Caradormis se reputa homo de questo zalabi de Magnisia, et altre volte ha desarmato una fusta con uno di homini de ditto zalabi de Domosli.

*A di primo novembrio.* Questa matina hè zonta